



官常典第四百六十卷

將帥部名臣列傳十八

晉三 謝元

按晉書謝安傳安兄子元字幼度少穎悟與從兄朗俱爲叔父安所器重安嘗戒約子姪因曰子弟亦何豫人事而正欲使其佳諸人莫有言者元答曰譬如芝蘭玉樹欲使其生於庭階耳安悅元少好佩紫羅香囊安患之而不欲傷其意因戲賭取卽焚之於此遂止及長有經國才略屢辟不起後與王珣俱被桓溫辟爲掾並禮重之轉征西將軍桓豁司馬領南郊相監北征諸軍事於時苻堅強盛邊境數被侵寇朝廷求文武良將可以鎮禦北方者安乃以元應舉中書郎郗超雖素與元不善聞而歎之曰安違衆舉親明也元必不負舉才也時咸以爲不然超曰吾嘗與元共在桓公府見其使才雖履屐間亦得其任所以知之於是徵還拜建武將軍兗州刺史領廣陵相監江北諸軍事時苻堅遣軍圍襄陽車騎將軍桓沖禦之詔元發三州人下遣彭城內史何謙游軍襄淮以爲形援襄陽旣沒堅將彭超攻龍驤將軍戴遂於彭城元率東莞太守高衡後軍將軍何謙次於泗口欲遣間

使報遂令知救至其道無由小將田泓請行乃沒水潛行將趣城爲賊所獲賊厚賂泓使云南軍已敗僞許之旣而告城中曰南軍垂至我軍行來報爲賊所得勉之遂遇害時彭超置輜重於留城元乃揚聲遣謙等向留城超聞之還保輜重謙馳進解彭城圍超復進軍南侵堅將句難毛當自襄陽來會超圍幽州刺史田洛於三阿有衆六萬詔征鹵將軍謝石率水軍次涂中右衛將軍毛安之遊擊將軍河間王曇之淮南太守楊廣宣城內史丘準次堂邑旣而盱眙城陷高密內史毛藻沒安之等軍人相驚遂各分散朝廷震動元於是自廣陵西討難等何謙解田洛圍進據白馬與賊大戰破之斬其僞將都督顏因復進擊又破之斬其僞將邵保超難引退元率何謙戴遂田洛追之戰於君川復大破之元參軍劉牢之攻破浮航及白船督護諸葛侃單父令李都又破其運艦難等相率北走僅以身免於是罷彭城下邳二戍詔遣殿中將軍慰勞進號冠軍加領徐州刺史還於廣陵以功封東興縣侯及苻堅自率兵次於項城衆號百萬而涼州之師始達咸陽蜀漢順流幽并係至先遣苻融慕容暉張蚝苻方等至潁口梁成王先等屯洛澗詔以元爲前鋒都督徐兗青三州揚州之晉陵幽州之燕國諸軍事與叔父征鹵將軍石從弟輔國將軍琰西中郎將桓伊龍驤將軍檀元建威

將軍戴熙揚武將軍陶隱等距之衆凡八萬元先遣廣陵相劉牢之五千人直指洛澗卽斬梁成及成弟雲步騎崩潰爭赴淮水牢之縱兵追之生擒堅僞將梁他王顯梁悌慕容屈氏等收其軍實堅進屯壽陽列陣臨肥水元軍不得渡元使謂苻融曰君遠涉吾境而臨水爲陣是不欲速戰諸君稍却令將士得周旋僕與諸君緩轡而觀之不亦樂乎堅衆皆曰宜阻肥水莫令得上我衆彼寡勢必萬全堅曰但却軍令得過而我以鐵騎數十萬向水逼而殺之融亦以爲然遂麾使却陣衆因亂不能止於是元與琰伊等以精銳八千涉渡肥水石軍距張蚝小退琰元仍進決戰肥水南堅中流矢臨陣斬融堅衆奔潰自相蹈藉投水死者不可勝計肥水爲之不流餘衆棄甲宵遁聞風聲鶴唳皆以爲王師已至草行露宿重以饑凍死者十七八獲堅乘輿雲母車儀服器械軍資珍寶山積牛馬驢騾駱駝十萬餘詔遣殿中將軍慰勞進號前將軍假節固讓不受賜錢百萬綵千匹旣而安奏苻堅喪敗宜乘其釁會以元爲前鋒都督率冠軍將軍桓石虔徑造渦潁經略舊都元復率衆次於彭城遣叅軍劉襲攻堅兗州刺史張崇於鄆城走之使劉牢之守鄆城兗州旣平元患水道險澀糧運艱難用督護聞人聃謀堰呂梁水樹柵立七埭爲派擁二岸之流以利運漕自此公私利便又進伐

青州故謂之青州派遣淮陵太守以三千人向廣固降堅青州刺史苻朗又進伐冀州遣龍驤將軍劉牢之濟北太守丁匡據碭濟陽太守郭滿據滑臺奮武將軍顏雄渡河立營堅子丕遣將桑據屯黎陽元命劉襲夜襲據走之丕惶遽欲降元許之丕告饑元饋丕米二千斛又遣晉陵太守滕恬之渡河守黎陽三魏皆降以兗青司豫平加元都督徐兗青司冀幽并七州軍事元上疏以方平河北幽冀宜須總督司州懸遠應統豫州以勳封康樂縣公元請以先封東興侯賜兄子玩詔聽之更封玩豫寧伯復遣寧遠將軍春演伐申凱於魏郡破之元欲令豫州刺史朱序鎮梁國元住彭城北固河上西援洛陽內藩朝廷朝議以征役既久宜置戍而還使元還鎮淮陰序鎮壽陽會翟遼據黎陽反執滕恬之又泰山太守張願舉郡叛河北騷動元自以處分失所上疏送節盡求解所職詔慰勞令且還鎮淮陰以朱序代鎮彭城元既還遇疾上疏解職詔書不許元又自陳既不堪攝職慮有曠廢詔又使移鎮東陽城元卽路於道疾篤上疏曰臣以常人才不佐世忽蒙殊遇不復自量遂從戎政驅馳十載不辭鳴鏑之險每有征事輒請爲軍鋒由恩厚忘軀甘死若生也冀有毫釐上報榮寵天祚大晉王威屢舉實由陛下神武英斷無思不服亡叔臣安協贊雍熙以成天工而霧霧尙翳

六合未朗遺黎塗炭巢窟宜除復命臣荷戈前驅董司戎首冀仰憑皇威宇宙寧一陛下致太平之
化庸臣以塵露報恩然後從亡叔臣安退身東山以道養壽此誠以形於文旨達於聖聽矣臣所以
區區家國實在於此不謂臣愆咎夙積罪鍾中年上延亡叔臣安亡兄臣靖數月之間相係殂背下
逮稚子尋復天昏哀毒兼纏痛百常情臣不勝禍酷暴集每一慟殆弊所以含哀忍悲期之必存者
雖哲輔傾落聖明方融伊周嗣作人懷自厲猶欲申臣本志隆國保家故能豁其情滯同之無心耳
去冬奉司徒道子告括囊遠圖逮問臣進止之宜臣進不達事機以感境爲恥退不自揆故欲順其
宿心豈謂經略不振自貽斯戾是以奉送章節待罪有司執徇常儀實有媿心而聖恩赦過黷法垂
宥使抱罪之臣復得更名於所司木石猶感而況臣乎願將身不良動與聲會謙德不著害盈是荷
先疾旣動便至委薦陛下體臣疾重使還藩淮側甫欲休兵靜衆綏懷善撫兼苦自療冀日月漸瘳
繕甲俟會思更奮迅而所患沉頓有增無損今者懷懷救命朝夕臣之平日率其常矩加以匪懈猶
不能令政理弘宣況今內外天隔永不復接寧可臥居重任以招患慮追尋前事可爲寒心臣之微
身復何足惜區區血誠憂國實深謹遣兼長史劉濟重奉送節蓋章傳伏願陛下垂天地之仁拯將

古今圖書集成
絕之氣時遣軍司鎮慰荒雜聽臣所乞盡醫藥消息歸誠道門冀神祇之祐若此而不差修短命也使臣得及視息瞻觀墳柏以此之盡公私真無恨矣伏枕悲慨不覺流涕詔遣高手醫一人令自消息又使還京口療疾元奉詔便還病久不差又上疏曰臣同生七人凋落相繼惟臣一己孑然獨存生荼酷無如臣比所以含哀忍痛希延視息者欲報之德實懷罔極庶蒙一瘳申其此志且臣孤遺滿目顧之惻然爲欲極其求生之心未能自分於灰土悽悽之情可哀可愍伏願陛下矜其所訴霽然垂恕不令微臣銜恨泉壤表寢不報前後表疏十餘上久之乃轉授散騎常侍左將軍會稽內史時吳興太守晉寧侯張元之亦以才學顯自吏部尙書與元同年之郡而元之名亞於元時人稱爲南北二元論者美之元旣與疾之郡十三年卒於官時年四十六追贈車騎將軍開府儀同三司諡曰獻武子煥嗣

何謙 戴遂

按晉書謝安傳始從元征伐者何謙字恭子東海人戴遂字安丘處士達之弟並驍果多權略達厲操東山而遂以武勇顯謝安嘗謂遂曰卿兄弟志業何殊遂曰下官不堪其憂家兄不改其樂遂以

軍功封廣信侯位至大司農

顧眾

按晉書本傳眾字長始吳郡吳人驃騎將軍崇之族弟也父祕交州刺史有文武才幹眾出後伯父
早終事伯母以孝聞光祿朱誕器之州辟主簿舉秀才除餘杭秣陵令並不行元帝爲鎮東將軍命
爲參軍以討華軼功封東鄉侯辟丞相掾祕卒交州人立眾兄壽爲刺史尋爲州人所害眾往交州
迎喪值杜弢之亂崎嶇六年乃還祕曾蒞吳興吳興義故以眾經離寇難共遺錢二百萬一無所受
及帝踐祚徵拜駙馬都尉奉朝請轉尙書郎大將軍王敦請爲從事中郎上補南康太守會詔除鄱
陽太守加廣武將軍眾徑之鄱陽不過敦敦甚怪焉及敦構逆令眾出軍眾遲迴不發敦大怒以軍
期召眾還詰之聲色甚厲眾不爲動容敦意漸釋時敦又怒宣城內史陸噉眾又辨明之敦長史陸
玩在坐代眾危懼出謂眾曰卿眞所謂剛亦不吐柔亦不茹雖仲山甫何以加之敦事捷欲以眾爲
吳興內史眾固辭舉吏部郎桓彝亦讓眾事並不行敦鎮姑孰復以眾爲從事中郎敦平除太子
中庶子爲義興太守加揚威將軍蘇峻反王師敗績眾還吳潛圖義舉時吳國內史庾冰奔於會稽

峻以蔡謨代之前陵江將軍張慙爲峻收兵於吳衆遣人喻慙慙從之衆乃遣郎中徐機告模曰衆已潛合家兵待時而奮又與張慙期效節謨乃檄衆爲本國督護揚威將軍仍舊衆從弟護軍將軍颺爲威遠將軍前鋒督護吳中人士同時響應峻遣將弘徽領甲卒五百鼓行而前衆與颺慙要擊微戰於高渚大破之收其軍實謨以冰當還任故便去郡衆遣颺率諸軍屯無錫冰至鎮御亭恐賊從海虞道入衆自往備之而賊率張健馬流攻無錫颺等大敗庾冰亦失守健等遂據吳城衆自海虞由婁縣東倉與賊別率交戰破之義軍又集進屯烏包會稽內史王舒吳興內史虞潭並檄衆爲五郡大督護統諸義軍討健潭遣將姚休爲衆前鋒與賊戰沒衆還守紫壁時賊黨方銳義軍沮退人咸勸衆過浙江衆曰不然今保固紫壁可得全錢唐以南五縣若越他境便爲寓軍控引無所非長計也臨平人范明亦謂衆曰此地險要可以制寇不可委也衆乃版明爲參軍明率宗黨五百人合諸軍凡四千人復進討健健退於曲阿留錢弘爲吳令軍次路丘卽斬弘首衆進往吳城遣督護朱祈等九軍與蘭陵太守李閔共守慶亭健遣馬流陶陽等往攻之閔與祈等逆擊大破之斬首三千餘級峻平論功衆以承檄奮義推功於謨謨以衆唱謀非己之力俱表相讓論者美之封鄱陽

縣伯除平南軍司不就更拜丹陽尹本國大中正入爲侍中轉尙書咸康末遷領軍將軍揚州大中正固讓不拜以母憂去職穆帝卽位何充執政復徵衆爲領軍不起服闋乃就是時充與武陵王不平衆會通其間遂得和釋充崇信佛教衆議其糜費每以爲言嘗與充同載經佛寺充要衆入門衆不下車充以衆州里宿望每優遇之以年老上疏乞骸骨詔書不許遷尙書僕射永和二年卒時年七十三追贈特進光祿大夫諡曰靖長子昌嗣

毛寶

按晉書本傳寶字碩真滎陽武人也王敦以爲臨湘令敦卒爲溫嶠平南參軍蘇峻作逆嶠將赴難而征西將軍陶侃懷疑不從嶠屢說不能迴更遣使順侃意曰仁公且守僕宜先下遣信已二日會寶別使還聞之說嶠曰凡舉大事當與天下共同衆克在和不開有異假令可疑猶當外示不覺況自作疑邪便宜急追信改舊書說必應俱征若不及前信宜更遣使嶠意悟卽追信改書侃果共征峻寶領千人爲嶠前鋒俱次茄子浦初嶠以南軍習水峻軍便步欲以所長制之宣令三軍有上岸者死時蘇峻送米萬斛饋祖約遣司馬桓撫等迎之寶告其衆曰兵法軍令有所不從豈可不

上岸邪乃設變力戰悉獲其人擄殺萬計約用大饑嶠嘉其勳上爲廬江太守約遣祖煥桓撫等欲襲湓口陶侃將自擊之寶曰義軍恃公公不可動寶請討之侃顧謂坐客曰此年少言可用也乃使寶行先是桓宣背約南屯馬頭山爲煥撫所攻求救於寶寶衆以宣本是約黨疑之宣遣子戎重請寶卽隨戎赴之未至而賊已與宣戰寶軍懸兵少器械濫惡大爲煥撫所破寶中箭貫髀徹鞍使人蹋鞍拔箭血流滿鞞夜奔船所百餘里望星而行到先哭戰亡將士洗瘡訖夜還救宣寶至宣營而煥撫亦退寶進攻祖約軍次東關破合肥尋召歸石頭陶侃溫嶠未能破賊侃欲率衆南還寶謂嶠曰下官能留之乃往說侃曰公本應領蕪湖爲南北勢援前旣已下勢不可還且軍政有進無退非直整齊三軍示衆必死而已亦謂退無所據終至滅亡往者杜叟非不彊盛公竟滅之何至於峻獨不可破邪賊亦畏死非皆勇健公可試與寶兵使上岸斷賊資糧出其不意使賊困感若寶不立效然後公去人心不恨侃然之加寶督護寶燒峻句容湖孰積聚峻頗乏食侃遂留不去峻旣死匡術以苑城降侃使寶守南城鄧嶽守西城賊遣韓晃攻之寶登城射殺數十人晃問寶曰君是毛廬江耶寶曰是晃曰君名壯勇何不出鬪寶曰君若健將何不入鬪晃笑而退賊平封州陵縣開國侯千

六百戶庾亮西鎮請爲輔國將軍江夏相督隨義陽二郡鎮上明又進南中郎隨亮討郭默默平與亮司馬王愨期等救桓宣於章山擊賊將石遇破之進征鹵將軍亮謀北伐上疏解豫州請以授寶於是詔以寶監揚州之江西諸軍事豫州刺史將軍如故與西陽太守樊峻以萬人守郟城石季龍惡之乃遣其子鑒與其將襲安李菟等五萬人來寇張貉渡二萬騎攻郟城寶求救於亮亮以城固不時遣軍城遂陷寶峻等率左右突圍出赴江死者六千餘人寶亦溺死亮哭之慟因發疾遂薨詔曰寶之傾敗宜在貶裁然蘇峻之難致力王室今咎其過故不加贈祭之可也其後公卿言寶有重勳加死王事不宜奪爵升平三年乃下詔復本封初寶在武昌軍人有於市買得一白龜長四五寸養之漸大放諸江中郟城之敗養龜人被鎧持刀自投於水中如覺墮一石上觀之乃先所養白龜長五六尺送至東岸遂得免焉寶二子穆之安之

毛德祖

按晉書毛寶傳寶宗人德祖父祖並沒於賊中德祖兄弟五人相攜南渡皆有武幹荊州刺史劉道規以德祖爲建武將軍始平太守又徙涪陵太守盧循之役道規又以爲參軍伐徐道覆於始興尋

遭母憂劉裕伐司馬休之版補太尉參軍義陽太守賜爵遷陵縣侯轉南陽太守從劉裕伐姚泓
攻滎陽扶風南安馮翊數郡所在尅捷裕嘉之以爲龍驤將軍秦州刺史裕第二子義真爲安西將
軍雍州刺史以德祖爲中兵參軍領天水太守從義真還裕以德祖督河東平陽二郡軍事輔國將
軍河東太守代劉遵考守蒲坂及河北覆敗德祖全軍而歸裕方欲蕩平關洛先以德祖督九郡軍
事冠軍將軍滎陽京兆太守以前後功賜爵灌陽縣男尋遷督司雍并三州諸軍事冠軍將軍司州
刺史戍武牢爲魏所沒德祖次弟疑疑弟辯並有志節疑死於盧循之難辯沒於魯宗之役並奮不
顧命爲世所歎

袁喬

按晉書袁瓌傳瓌子喬字彥叔初拜左著作郎輔國將軍桓溫請爲司馬除司徒左西屬不就拜尚
書郎桓溫鎮京口復引爲司馬領廣陵相初喬與褚裒友善及康獻皇后臨朝喬與裒書曰皇太后
踐登正阼臨御皇朝將軍之於國外姓之太上皇也至於皇子近屬咸有揖讓之禮而況策名人臣
而交媒人父天性攸尊亦宜體國而重矣故友之好請於此辭染絲之變黑翟致懷岐路之感楊朱

興歎況與將軍游處少長雖世譽先後而臭味同歸也平昔之交與禮數而降箕踞之權隨時事而替雖欲虛詠濠肆脫落儀制其能得乎來物無停變化遷代豈惟寸晷事亦有之夫御器者神制衆以約願將軍怡情無事以理勝爲任親仗賢達以納善爲大執筆惆悵不能自盡論者以爲得禮遷安西諮議參軍長沙相不拜尋督沔中諸戍江夏隨義陽三郡軍事建武將軍江夏相時桓溫謀伐蜀衆以爲不可喬勸溫曰夫經略大事故非常情所具智者了於胸心然後舉無遺筭耳今天下之難二寇而已蜀雖險固方胡爲弱將欲除之先從易者今泝流萬里經歷天險彼或有備不必可尅然蜀人自以斗絕一方恃其完固不修攻戰之具若以精卒一萬輕軍速進比彼聞之我已入其險要李勢君臣不過自力一戰擒之必矣論者恐大軍旣西胡必闚覷此又似是而非何者胡聞萬里征伐以爲內有重備必不敢動縱復越逸江渚諸軍足以守境此無憂矣蜀土富實號稱天府昔諸葛武侯欲以抗衡中國今誠不能爲害然勢據上流易爲寇盜若襲而取之者有其人衆此國之大利也溫從之使喬以江夏相領二千人爲軍鋒師次彭模去賊已近議者欲兩道並進以分賊勢喬曰今深入萬里置之死地士無反顧之心所謂人自爲戰者也今分爲兩軍軍力不一萬一偏敗則

大事去矣不如全軍而進棄去釜甌齋三日糧勝可必矣溫以爲然卽一時俱進去成都十里與賊大戰前鋒失利喬軍亦退矢及馬首左右失色喬因麾而進聲氣愈厲遂大破之長驅至成都李勢旣降勢將鄧定隗文以其屬反衆各萬餘溫自擊定喬擊文破之進號龍驤將軍封湘西伯尋卒年三十六溫甚悼惜之追贈益州刺史諡曰簡喬博學有文才注論語及詩并諸文筆皆行於世子方平嗣亦以軌素自立辟大司馬掾歷義興琅邪太守卒子山松嗣

桓宣

按晉書本傳宣譙國鉅人也祖詡義陽太守父弼冠軍長史宣開濟篤素爲元帝丞相舍人時塢主張平自稱豫州刺史樊雅自號譙郡太守各據一城衆數千人帝以宣信厚又與平雅同州里轉宣爲參軍使就平雅平雅遣軍主簿隨宣詣丞相府受節度帝皆加四品將軍卽其所部使扞禦北方南中郎將王含請宣爲參軍頃之豫州刺史祖逖出屯廬州遣參軍殷乂詣平雅乂意輕平視其屋云當持作馬廐見大鑊欲鑄作鐵器平曰此是帝王大鑊天下定後方當用之奈何打破乂曰卿能保頭不而惜大鑊邪平大怒於坐斬乂阻兵固守歲餘逖攻平殺之而雅據譙城逖以力弱求助於

含含遣宣領兵五百助逃逃謂宣曰卿先已說平雅信義大著於彼今復爲我說雅雅若降者方相擢用不但免死而已宣復單馬從兩人詣雅曰祖逃方欲平蕩二寇每倚卿爲援前殷父輕薄非豫州意今若和解則忠勳可立富貴可保若猶固執東府赫然更遣猛將以卿烏合之衆憑阻窮城強賊伺其北國家攻其南萬無一全也願善量之雅與宣置酒結友遣子隨宣詣逃少日雅便自詣逃逃遣雅還撫其衆雅僉謂前數罵辱懼罪不敢降雅復閉城自守逃往攻之復遣宣入說雅雅卽斬異己者遂出降未幾石勒別將圍譙城含又遣宣率衆救逃未至而賊退逃留宣討諸未服皆破之遷譙國內史祖約之棄譙城也宣以牋諫不從由是石勒遂有陳留及約與蘇峻同反宣謂祖智曰今強胡未滅將勦力以討之而與峻俱反此安得久乎使君若欲爲雄霸何不助國討峻威名自舉智等不能用宣欲諫約遣其子戎白約求入約知宣必諫不聽宣遂距約不與之同邵陵人陳光率部落數百家降宣宣皆慰撫之約還歷陽宣將數千家欲南投尋陽營於馬頭山值祖煥欲襲湓口陶侃使毛寶救之煥遣衆攻宣宣使戎求救於寶寶擊煥破之宣因投溫嶠嶠以戎爲參軍賊平宣居於武昌戎復爲劉胤參軍郭默害胤復以戎爲參軍陶侃討默默遣戎求救於宣宣僞許之西陽

太守鄧嶽武昌太守劉翽皆疑宣與默同豫州西曹王隨曰宣尙背祖約何緣同郭默邪嶽翽乃遣隨詣宣以觀之隨謂宣曰明府心雖不爾無以自明惟有以戎付隨耳宣乃遣戎與隨俱迎陶侃辟戎爲掾上宣爲武昌太守尋遷監沔中軍事南中郎將江夏相石勒荊州刺史郭敬戍襄陽陶侃使其子平西參軍斌與宣俱攻樊城拔之竟陵太守李陽又破新野敬懼遁走宣與陽遂平襄陽侃使宣鎮之以其淮南部曲立義成郡宣招懷初附勸課農桑簡刑罰略威儀或載鉏耒於輶軒或親芸穫於隴畝十餘年閭閻石季龍再遣騎攻之宣能得衆心每以寡弱距守論者以爲次於祖逖周訪侃方欲使宣北事中原會侃薨後庾亮爲荊州將謀北伐以宣爲都督沔北前鋒征討軍事平北將軍司州刺史假節鎮襄陽季龍使騎七千渡沔攻之亮遣司馬王愨期輔國將軍毛寶救宣賊三面爲地窟攻城宣募精勇出其不意殺傷數百多獲鎧馬賊解圍退走久之宣遣步騎收南陽諸郡百姓沒賊者八千餘人以歸庾翼代亮欲傾國北討更以宣爲都督司雍梁三州荊州之南陽襄陽新野南鄉四郡軍事梁州刺史持節將軍如故以前後功封竟陵縣男宣久在襄陽綏撫僑舊甚有稱績庾翼遷鎮襄陽令宣進伐石季龍將李騫軍次丹水爲賊所敗翼怒貶宣爲建威將軍使移戍峴山